

Evening Dogri (NSD)

13-06-2024

1915 hrs

खास खबरां:-

- 1 प्रधानमंत्री नरेन्द्र मोदी होर जी-7 शिखर सम्मेलन च हिस्सा लैने लेई अज्ज ईटली जा करदे न। शिखर सम्मेलन दे बाहरे ओ उत्थूं दी प्रधानमंत्री हुंदे कन्नै दबक्खी बैठक बी लांगन।
- 2 बीजेपी नेता पेमा खांडू होरें अज्ज अरुणाचल प्रदेश दे मुख्मन्त्री दे तौरा पर सगंध चुक्की। ओ उपरोतली त्रीह बारी मुख्मन्त्री दे औहदे पर बैठे न।
- 3 नीट दे मतेयान च शामिल उनें सब्बने 1 ज्हार 563 विद्यार्थिं दा मतेयान परतियै लैता जाग जिनेंगी ग्रेस मार्क्स दित्ते गे हे। एह मतेयान 23 जून गी होग।
- 4 कुवैत च अगग लगने दी घटना दे कारणें दी जांच शुरू करी दित्ती गई ऐ। इस हादसे च 40 भारतय समेत 49 लोकें दी मौत होई गई ते केई दुए घायल होए दे न।
- 5 रक्षा मंत्री राजनाथ सिंह होरें आखेआ ऐ जे सरकार अगले 5एं ब'रें च मुख्खै दा रक्षा निर्यात 50 ज्हार करोड़ रुपे तगर बधाने दा लक्ष्य रखदी ऐ।
- 6 जम्मू कश्मीर दे डोडा जिले च सुरक्षा बलें कन्नै टाकरे मगरा तुपाई अभियान तेज करी दित्ता गेआ ऐ।
- 7 भारत नै 7 जून गी चीन ते पाकिस्तान आस्सेआ जारी सांझे ब्यान च जम्मू कश्मीर । जिक्क करने गी सिरे थमां खारज करदे होई एहदे पर अपनी त्रिक्खी प्रतिक्रिया दित्ती ऐ।
- 8 भारत दे बाद वेस्टइंडीज नै बी मर्दे दे आईसीसी टी-20 दे सुपर-8 च अपनी थाहर पक्की करी लैती ऐ।

<><><><><><>

PM-G-7

प्रधानमंत्री नरेन्द्र मोदी होर कल जी-7 शिखर सम्मेलन च हिस्सा लैने लेई ईटली दे अपूलिया लेई अज्ज रवाना होआ करदे न। विदेश सचिव विनय कवात्रा होरें नमीं दिल्ली च समाचार माध्यमें गी जानकारी दिंदे होई आखेआ जे शुक्रवारें होने आले सम्मेलन लेई भारत गी इक आउटरीच मुख्खै दे तौर पर साददा दित्ता गेआ ऐ। लगातार त्री बारी औहदा संभालने मगरा प्रधानमंत्री हुंदी एह विदेश दी पैहली यात्रा ऐ। उनें आखेआ जे एह दौरा जी-7 शिखर सम्मेलन च मजदूद दुनिया दे लीडरें कन्नै गल्लबात दा मौका ऐ। जेहदे च भारत ते कुल संसारी दक्खन दे महत्वै आले मसलें पर सोच बचार कीता जाग। नमीं दिल्ली च प्रधानमंत्री हुंदे इस दौरे बारे जानकारी दिंदे होई श्री कवात्रा होरें इब्बी दस्सेआ जे इस शिखर सम्मेलन च ऊर्जा ते आर्टीफिशल इंटेलीजेंस जनेह विषयें पर बी प्रमुखता कन्नै सोच बचार कीता जाग। मोदी हुंदा शिखर सम्मेलन दे बाहरें ईटली दी प्रधानमंत्री जिओर्जिया मेलोनी हुंदे कन्नै दबक्खी बैठक लाने दा बी कार्यक्रम ऐ।

<><><><><><>

Arunachal-CM

बीजेपी दे लीडर पेमा खांडू होर अज्ज अरुणाचल प्रदेश दे मुख्मन्त्री दे तौर पर सगंध लैती। सगंध चुकने आला समारोह बडलै 11 बजे ईटानगर च दोरजे खांडू कन्वेशन सेंटर च लगगा। श्री खांडू होरें कल राजभवन च गवर्नर लैफ्टिनेंट जनरल के.टी.पारनिक हुंदे कन्नै मुलाकात कीती ही ते नमीं सरकार बनाने दा दावा पेश कीता हा। मगरा गवर्नर होरें उनेंगी नमीं सरकार बनाने दा साददा दित्ता हा। केन्द्री मंत्री अमित शाह, बीजेपी दे अध्यक्ष जे.पी.नड्डा होर सगंध चुकने आले प्रोग्राम च शामिल होए।

<><><><><><>

NEET-Retest

मैडिकल प्रवेश परीक्षा—नीट यूजी च शामिल होए दे उनें सब्बने इक जहार 563 मेदवारें दा परतियै मतेयान 23 जून गी होग, जिनें गी मतेयान च ग्रेस जां फही पूरक अंक थहोए न। जारी इक अधिसूचना च राष्ट्र परीक्षा अर्जेसी नीट नै आखेआ ऐ जे ओह तौले गै इक सार्वजनिक सूचना जारी करोग ते इनें मेदवारें थमां ईमेल दे माध्यम राएं बी संपर्क करोग तां जे एह जकीनी कीता जाई सकै जे उनेंगी अधिकरिक जानकारी हासल होई गई ऐ। एनटीए नै आखेआ जे परतियै परीक्षा दा फैसला एनटीए दी बड़े मते इख्तेयारें आली समिति दी रिपोर्ट पर सुप्रीम कोर्ट दी टिप्पणी दे मूजब लैता गोआ ऐ। सब्बने इक जहार 563 मेदवारें गी दित्ते गेदे ग्रेस जां पूरक अंक वापस लेई लैते गे न। तोआई केन्द्रीय शिक्षा मंत्री धर्मेन्द्र प्रधान होरें नीट—यूजी परीक्षा दे पेपर कथित तौर लीक होने दी गल्ला थमां इंकार कीता ऐ। उनें इस गल्ला पर जोर दित्ता जे नीट परीक्षा च कोई भ्रष्टाचार नैई ऐ।



Kuwait Fire

कुवैत च पेश आए दे अग्ग लगने आले हादसे दे कारणें दी जांच शुरू करी दित्ती गई ऐ। जियां जे पैहले बी खबर दित्ती जाई चुकी दी ऐ ते कुवैत दे दक्खनी मनगाफ इलाके च इक इमारत च अग्ग लगने कारण 49 लोकें दी मौत होई गई ऐ। जिंदे चा 40 लोक भारतीय न। इस हादसे च केई घायल होए दे न, जिंदा इलाज चलै करदा ऐ। कुवैत दे विदेश मंत्री अब्दुल्लाह अल ते सेहत मंत्री डॉ. अहमद अल अवाजी होर अल—अदान अस्पताल जाइयै घायलें दी डौल पुच्छी। इक प्रेस कांफ्रेंस च जानकारी दित्ती गई ऐ जे सरकार घायलें गी इलाज च हर सुविधा ते मदाद देग। इस्सै दरान प्रवासी केरल भारतीयें दे मामले सरबंधी संस्थान नारका रूटस नै हादसे दे प्रभावत लोकें लेई विशेष हैल्प डैस्क कायम कीता ऐ। एहदे शा पैहले भारतीय विदेश मंत्री डॉ. एस.जयशंकर होरें उत्थूं दे विदेश मंत्री कोला हादसे बारे जानकारी हासल कीती ते मारे गेदे लोकें दे शव भारत भेजने दी बवस्था करने लेई बी आखेआ। विदेश राज्य मंत्री कीर्ती वर्धन सिंह होरें कुवैत पुज्जियै हालात दा जायजा लैता ते घायलें कन्नै गल्लबात बी कीती।



IMD

भारतीय मौसम विभाग नै जम्मू कश्मीर दे जम्मू संभाग, उत्तराखंड, पंजाब, हरियाणा, चंडीगढ़, दिल्ली, मध्यप्रदेश, राजस्थान, हिमाचल प्रदेश ते ओडिशा च अगले त्रै—चार दिनें तोड़ी गर्मी दी लैहर बरकरार रौहने दी पेशगोई कीती ऐ। मैहकमे दा आखना ऐ जे दक्खन—पच्छमी मानसून दे होर अगड़े बघने कन्नै अगले 2—3 दिनें तगर ओडिशा दे किश हिस्सें, आंध्रप्रदेश दे समुंद्रै कन्नै लगदे इलाके ते उत्तर पच्छमी बंगाल दी खाड़ी दे इलाके च गर्मी थमां राहत थहोई सकदी ऐ। तोआई पच्छम बंगाल दे उप—हिमालयाई इलाके, सिक्किम ते पूर्वोत्तर भारत च अगले 4—5 दिनें दरान भारी बरखा दी पेशगोई कीती गई ऐ।



ShareMarket

भारतीय शेयर बजार च सैंसेक्स ते निफ्टी अज्ज सैले नशान कन्नै बंद होए। घरेलू सतह पर कुलसंसारी सारतें दा अज्ज सकारात्मक असर दिखने गी लब्भा। बाम्बे स्टॉक एक्सचेंज दा संवेदी सूचकांक अज्ज 204 अंक यानि 0.27 फीसद दे उछाल कन्नै 76 जहार 811 अंके पर बंद होआ। नेशनल स्टाक एक्सचेंज दा निफ्टी 76 अंक यानि 0.33 फीसद पर आइयै 23 जहार 399 पर पुज्जी गोआ। बाम्बे स्टाम्क एक्सचेंज दे विस्टल बजार च अज्ज मिडकैप च 0.79 फीसद दी बढ़त दिक्खी गई जिसलै जे स्मॉल कैप सूचकांक च बी 0.89 फीसद दा फायदा दर्ज कीता गोआ ऐ।



UN-Migrants

संयुक्त राष्ट्र नै अज्ज आखेआ ऐ जे 2023 दी शुरुआत कोला लेइयै मई 2024 तगर रिकार्ड 12 करोड़ लोक, कुल संसारी सतह पर जबरन विस्थापत आली स्थिति च र'वा करदे न। संयुक्त राष्ट्र दी रफूजिएं सरबंधी अजेंसी नै अपनी इक रिपोर्ट च आखेआ ऐ जे 2023 ते खीर तगर कोई 11 करोड़ 73 लक्ख लोक जबरन विस्थापत हे। एह लोक हिंसा, मनुक्खी अधिकारें दी खलाफवर्जी, अबवस्था, जुल्म ज्यादतिएं दे कारण अपना घर बाहर छोड़ियै विस्थापत होए दे न। संयुक्त राष्ट्र शरणार्थी उच्चायुक्त फिलिप्पो ग्रांडी होरें दस्सेआ जे विस्थापत दा सब्बने शा बड्डा कारण संघर्ष ऐ। म्यामार, अफगानिस्तान, यूक्रेन, फिलिस्तीन, कांगो, सोमालिया, हैली, सीरिया ते ऑनिया ऐसे मुख् न जित्थें संघर्ष ते हिंसा दे कारण अपनी जान बचाइयै होरने थाहरें उठी गेदे न।



Film Festival

मुंबई अंतर्राष्ट्रीय फिल्म उत्सव एमआईएफएफ 15 कोला 21 जून तगर मुंबई च आयोजित कीता जाग। एह फिल्मोत्सव "बिली एंड मौली—एम ओटर लव स्टोरी फिल्म दे दस्से जाने कन्नै शुरु होग। एह फिल्म 15 जून गी दिल्ली, कोलकाता, चेन्नई ते पुणे च कन्नो—कन्नी दस्सी जाग। एह फिल्म रेड—कोपेर्ट इवेंट दरान बी 17 जून गी दिल्ली, 18 तरीक चेन्नई, 19 गी कोलकाता ते 20 जून गी पुणे च दस्सी जाग। बिली एंड मौली: एंड ओटर लव स्टोरी 78 मिटें दी अंग्रेजी फिल्म ऐ, जेहदा निर्देशन चाली हैमिल्टन जेम्स नै कीते दा ऐ। एह इक ऐसे आदमी दी कहानी ऐ जेहडश्रा दूर दरेडे शेटलैंड टापू समूह च रौहदे होई मौली नां दे इक जंगली अदबिलाव कन्नै दोस्ती करी लैदा ऐ। बिली एंड मौली हिर्ख ते लगाव दिएं गैहराइएं ते माहनू ते कुदरत बश्कार गैहर सरबंधें दी पड़ताल करदा ऐ।



ICC World Cup

मर्दे दे आईसीसी टी-20 विश्व कप क्रिकेट दे कल रातीं न्यूयार्क दे नस्साउ काउंटी अंतर्राष्ट्रीय स्टेडियम च खेड्डे गेदे इक मैच च भारत नै अमरीका गी 7एं विकटें कन्नै हराई दित्ता। इस जित्त दे कन्नै गै भारत सुपर-8 च अपनी थाहर पक्की करी लैती ऐ। पैहले मैच च वेस्टइंडीज दा मकाबला त्रिनिदाद दे ब्रायन लारा स्टेडियम च न्यूजीलैंड कन्नै होआ जिसलै जे दुआ मकाबला संजा किंगसटाउन च बंगलादेश ते नीदरलैंड बश्कार होग। बडलै खेड्डे गेदे मैच च वेस्ट इंडीज नै न्यूजीलैंड गी 13 रंजें कन्ने हराइयै सुपर-8 च अपनी थाहर पुक्की करी लैती ऐ। पैहले बल्लेबाजी करदे होई वेस्टइंडीज नै 9 विकटें दे नुकसान पर 149 रंज बनाए हे, जेहदे परते च न्यूजीलैंड दी टीम 9 विकटें दे नुकसान पर 136 रंज गै बनाई सकी। अज्ज दा दूआ मैच भारतीय समें दे मताबक रातीं 8 बजे शुरु होग।



PM-Kuwait

प्रधानमंत्री नरेन्द्र मोदी होरें कुवैत शैहर च अगग लगने आली घटना पर दुख जाहर कीता। उनें आखेआ जे उंदी हमददीं उनें सारे लोकें कन्नै ऐ जिने अपनं गी गवाया ऐ। उनें घायलें दे तौले नरोए होन दी कामना कीती। प्रधानमंत्री होरें आखेआ जे कुवैत च भारतीय दूतावास स्थिति पर तक्क रक्खा'रदा ऐ ते प्रभावतें दी सहायता लेई अधिकारी कन्नै कम्म करा'रदा ऐ।



Indian Army Kargil

भारतीय सेना नै इक पैन इंडिया मोटर सैकल अभियान शुरु कीता जेहडा 1999 दे कारगिल युद्ध च पाकिस्तान पर भारत दी जित्त दे 25 ब'रे पूरे होने दे चेतें च इक यात्रा ऐ। रक्षा मंत्रालय नै आखेआ ऐ जे एह अभियान मुख् दे वीर सैनिकें दे महत्वपूर्ण योगदान गी दर्शाने ते उंदी विरासत दा सम्मान करने दा कम्म करदा ऐ। 8-8 मोटर सैकल चालक त्रै दलें च मुख् दे त्रै कोणे असम दे दिनजान, गुजरात दे द्वारका ते तमिलनाडू दे धनुषकोडी थमां इस ऐतिहासक यात्रा पर निकले न। एह बक्ख-बक्ख इलाके ते रस्ते गी पार करोग जेहडा सशस्त्र बलें दी एकता ते लचीलेपन दा प्रतीक ऐ।

UGC

विश्वविद्यालय अनुदान आयोग यूजीसी नै उच्च शिक्षण संस्थानें गी अगले माली ब'रे थमां साल च छात्रें गी दो बारी प्रवेश देने दी इजाजत देने दा फैसला लैता ऐ। इसलै यूजीसी इक ब'रे च इक शैक्षणिक सत्र च प्रवेश दी इजाजत दिंदा ऐ। यूजीसी दे अध्यक्ष प्रो. एम.जगदीश कुमार होरें आखेआ जे एह्दे कन्नै उनें बच्चें गी मता फायदा थहोग जिंदे बोर्ड दे नतीजे दी घोषणा च चिर होई जंदा ऐ जां फही जेह्ड़े निजी कारणें करी दाखले थमां रेई जंदे न।



NEET

राष्ट्रीय परीक्षा अर्जेसी नै नीट 2024 परीक्षा दे नतीजे दी घोषणा मगरा आम तौरा उप्पर पुच्छे जाने आले सुआलें दी सूचि जारी कीती ऐ। इस म्हीने दी 4 तरीक गी घोषत कीते गेदे नीट नतीजें च कथित गड़बड़िणं गी दिक्खदे होई एह् प्रश्नावली जारी कीती गई ऐ। मतेयान देने आले विद्यार्थिणं गी समें दी हानि लेई कंपेनस्टरी नंबर देने च शकैत निवारण समिति दी भूमका उप्पर अर्जेसी नै गलाया जे इक समिति दा गठन कीता गेआ हा। समिति नै त्थयात्मक रिपोर्ट दे आधार उप्पर शकैतें उप्पर बचार कीता, जे कोई बी परीक्षार्थी, परीक्षा च 118 ते 119 नंबर किया हासल करी सकदा ऐ। इस सुआला दे परते च अर्जेसी नै स्पष्ट कीता जे कंपेनस्टरी नंबरें करी दो विद्यार्थिणं गी 118 ते 119 नंबर हासल होए। केन्द्रीय मंत्रिमंडल नै नीट परीक्षा च 1 ज्हार 500 शा मते परीक्षार्थिणं गी दित्ते गेदे ग्रेस मार्क्स दी समीक्षा लेई 4 सदस्यें दे पैनल दा गठन कीता ऐ।



Parliament

18मीं लोकसभा दा पैहला सत्र इस म्हीने दी 24 तरीक कोला शुरू होआ'रदा ऐ। इस सत्र च नमें चनोए दे भिंबरें गी सगंध चुकाई जाग ते लोकसभा अध्यक्ष दा चुनां कीता जाग। इस इजलास दी शुरूआत राष्ट्रपति द्रौपदी मुर्मू हुंदे आस्सेआ दौनें सदनें गी सांझे तौरा पर संबोधत कीते जाने कन्नै होग। जेह्दे मगरा उंदे अभिभाषण पर चर्चा होग। राज्यसभा दा इजलास बी इस म्हीने दी 27 तरीक कोला शुरू होग। संसद दा एह् इजलास अगले म्हीने दी 3 तरीक तोड़ी चलोग। संसदीय कार्य मंत्री किरन रिजिजू होरें एह् जानकारी इक सोशल मीडिया पोस्ट पर दित्ती ऐ। उनें आखेआ जे देसै दी जनता नै चुनाएं दरान वोट पाइयै अपना फैसला सनाई दित्ता ऐ ते हून देस दी सेवा लेई कम्म करना साढा फर्ज ऐ। रिजिजू होरें आखेआ जे 140 करोड़ भारतवासिणं दिणं आसै-तागें गी पूरा करने लेई चर्चा ते सोच बचार करने लेई संसद इक आदर्श मंच ऐ।



Sikkim

11मीं सिक्किम विधानसभा दा पैहला सत्र कार्यवाहक स्पीकर संजीत खरेल हुंदी अध्यक्षता च अज्ज होआ। सदन नै सिक्किम क्रांतिकारी मोर्चा दे मेदवार ते साबका मंत्री मिग्मा नोरबू शेरपा होरें गी सदन दा अध्यक्ष चुनेआ ते राजकुमारी थापा सदन दी उपाअध्यक्ष चुनियां गोइयां। सत्र दी शुरूआत च नमें चुनाए दे सदस्यें सगंध लैती। एह् सगंध प्रोटेन स्पीकर होरें दोआई। सिक्किम क्रांतिकारी मोर्चा गी राज्य च दूई बारी परतियै सरकार बनी ऐ। इस गी 32 थमां 31 सीटां हासल होइयां।



IIT Open House

इंडियन इंस्टीच्यूट ऑफ टैक्नालोजी आईआईटी दिल्ली 15 जून गी उनें मेदवारें जिनें जेईई एडवांस 2024 मतेयान पास करी लैता ऐ, उंदे आस्तै अपने दिल्ली ते यूएई दे अबूधाबी परिसर च इक खुल्ले सत्र दा सरिस्ता करोग। संस्थान नै आखेआ जे उस कार्यक्रम राणं मेदवारें अबूधाबी ते दिल्ली परिसर च उपलब्ध बक्ख-बक्ख मौके बारे जानी सकगंन। दौनें परिसरें च छात्रें दे सुआलें दा परता बी दित्ता जाग। एह् कार्यक्रम हायब्रिड मोड च आयोजित होग ते बडलै 9 बजे थमां दपैहरी 2 बजे तगर चलोग।



NHLC Widow

मनुक्खी अधिकारें सरबंधी राष्ट्रीय आयोग नै विधवाएं दे कलयाण उंदे अधिकारें गी जकीनी करने आस्तै केन्द्र राज्य सरकार ते केन्द्र शासत प्रदेश प्रशासन गी इक परामर्श जारी कीता। आयोग नै विधवाएं आस्तै 10 प्रमुख खेतरे पर ध्यान देने लेई आखेआ।



India

विश्व बैंक दी ताजा रिपोर्ट मूजब भारत अगले 3 वित्तिय बरे च 6.7 फीसदी स्थिर विकास दर कन्नै विश्व दी सब्बने शा तेजिया कन्नै बधने आली अर्थबवस्था बनी दी रौहग। एह वृद्धि घरेलू मंग, निवेश च बधदे ते सेवा क्षेत्र कन्ने जुड़ी दी गतिविधिएं कन्नै प्रेरित ऐ।



Cricket

आईसीसी टी-20 विश्व कप क्रिकेट च अज्ज भारत दा मकाबला अमरीका कन्नै होग। एह मैच न्यूयार्क दे नस्सउ काउंटी अंतर्राष्ट्रीय क्रिकेट स्टेडियम च खेड्डेआ जाग। दवै टीमां अपने पिछले दऊं मकाबलें च जित्त हासल करियै इस मैच च मैदान च उतरा करदे न। भारतीय टीम नै आयरलैंड ते पाकिस्तान दे खलाफ जित्त हासल कीती ही जिसलै जे अमरीका नै अपने पिछले दऊं मकाबलें च कनाडा ते पाकिस्तान गी हराया हा। भारती ग्रुप च बेहतर रन रेट दे स्हाबै पैहले नंबर पर ते अमरीका दुए नंबरे पर ऐ। अज्ज दो मैच खेड्डे जांगन। एंटीगुआ दे सर विवियन स्टेडियम च आस्ट्रेलिया दा मकाबला नामीबिया कन्नै होग ते फ्लोरिडा दे सेंद्रल ब्रोवार्ड रीजनल पार्क स्टेडियम च श्रीलंका दा मकाबला नेपाल कन्नै होग। एहदे थमां पैहले अमरीका दे न्यूयार्क च नस्साउ काउंटी अंतर्राष्ट्रीय स्टेडियम च पाकिस्तान नै कनाडा गी 7एं विकटें कन्नै हराया। पाकिस्तान नै 107 रंजें दे लक्ष्य गी 17.3 ओवरें च त्रै विकटां मुआइयै जित्त हासल कीती। मोहम्मद रिजवान नै 53 गेंदें च 53 रंज ते बाबर आजम नै 33एं गेंदे च 33 रंज बनाए। पैहले बल्लेबाजी करदे होई कनाडा दी टीम नै 20 ओवरें च 7 विकटें दे नुक्सान कन्नै 106 रंज बनाए।

